



БЛАГОВѢСТНИК

РОЧНИК VII. * ЧИСЛО 7. * ЮЛІЙ 1927.

ОТВѢЧАТЕЛЬНЫЙ РЕДАКТОР: О. ЕМИЛІЯН БОКШАЙ

СОДЕРЖАНИЕ:

Свѣтло Христово. — Де знайти правду? Унія и схизма на Подк. Руси. — Большевицькое выхованя.

— Житя св. малої Терезії. — Въ оборонѣ вѣры. — Місячное намѣреніе на Юлій. — Дописи. — Новости.

ВЫДАЕ ВЫДАВНИЦТВО ЧИНА СВ. ВАСИЛІЯ ВЕЛ. В УЖГОРОДѢ

ИЗ КНИГОПЕЧАТНИ ОО. ВАСИЛІЯН В УЖГОРОДѢ, УЛ. РАКОВЦІЯ ЧИСЛО 54.

Выдавництво Чина св. Василія Великого въ Ужгородѣ

поручає слѣдуючъ книжки своего изданія:

Да святится Имя Твое. Молитвословъ для молодежи, составиль о. П. К. ЧСВВ. Стор. 231. (Печат. церковнославянскими буквами).

Содержаніе: Короткій катехизмъ. Молитвы повседневніи, утренніи, вечерніи, подчасъ Службы Божої, передъ и по Сповѣди, передъ и по св. Причастію, до Пресв. Сердца Іисуса, до Преч. Дѣви Марії и до св. Іосифа; Чинъ Вечерни, Утрени, Божественна Литургія, Тропари и Кондаки воскресни, на всякое прошеніе и о усопшихъ; Пѣснѣ на Рождество Христове, въ честь Пресв. Троїцѣ, къ Пресв. Дѣвѣ Маріи и въ честь св. Отца Николая.

Оправленій коштує 5 Кч., а зъ почтовою засылкою 5 Кч 60 гелеровъ.

Молебень къ Святѣйшому Сердцу Іисуса и къ Преч. Дѣвѣ Маріи. Содержить кромѣ 2 молебновъ, дасколько пѣсней къ Пресв. Сердцу Іисуса и Преч. Дѣвѣ Маріи и Пѣснь благальну (супликацію). Печатана окремо руською, а окремо латинскою азбukoю.

Стор. 44. — Книжочка стоить 80 гел., съ почтовою засылкою 1 Кч.

Найсвятѣйшое Сердце Спасителя. Коротка наука для членовъ о-ва Святѣйшого Сердца Іисуса Христа. Изд. 6-ое. Стор. 64.

Содержаніе: Исторія набожности до Пресв. Сердца Іисуса и ласки, которая Іисусъ пріобѣнявъ почитателямъ Пресв. Сердца. Повинности для членовъ сего общества. Дасколько молитовъ къ Пресв. Сердцу Іисуса. Молебень къ Пресв. Сердцу Іисуса. Пѣсня благальна (супликація). Золота корунка къ П. С. Іисуса. Дасколько пѣсней къ П. С. Іисуса. Прочто почитаеме П. Сердце Іисуса? Печатана окремо руською, а окремо латинською азбukoю.

Книжочка сея стоитъ 1·50 Кч., а зъ почтовою засылкою 1·70 Кч.

Популярнѣ катехитичнѣ проповѣди для католицкого народу. Часть I. Зъ нѣмецкого переложивъ о. др. Ярославъ Левицкій. Книжка мѣстить въ собѣ 81 практичныхъ проповѣдей про вѣру въ систематичномъ порядку. Оброблюванѣ темы дуже актуальнѣ.

Цѣна за 1 примѣрникъ 20 Кч., а зъ почтовою засылкою 21·80 Кч.

Стойте въ вѣрѣ. Листъ I. Изясnenie правды св. каѳолицкої Церкви про походженя св. Духа отъ Отца и Сына. Стор. 7. Листъ II. Оборона чести Пресвятої Дѣви Маріи. Стор. 7.

Цѣна обохъ брошуръ разомъ 60 гел., съ почтовою засылкою 80 гел.

Протиалькоголичнѣ брошурки: 1. „Пяницямъ на закуску“, 2. „Погарчикъ для тверезыхъ“, 3. „На здоровля“. Цѣна 3 брошурокъ 1·20 Кч, зъ почт. 1·60 Кч.

Засылається лемъ за готовѣ грошѣ або за послѣплатою (dobirka)

Листы и грошѣ треба засылати на адресу:

Выдавництво Чина св. Василія Великого, Ужгородъ,
Раковци улица число 54.

Листы изъ заграницы треба адресовати такъ:

Vydavnyctvo Čyna sv. Vasiliya Velikoho, Užhorod,
Rakovci ulica č. 54. Podkarp. Rus. ČSR. — Европа.

БЛАГОВѢСТНИКъ

ДУХОВНА ГАЗЕТА ДЛЯ ПОДКАРПАТСКИХЪ РУСИНОВЪ

Выходитъ 1-го кождого мѣсяца.

Адреса

Редакцій, адміністрацій и експедицій:
Видавництво Чина св. Василія Великого
шт. Ужгородѣ, улиця Раковци число 54.

Предплата:

Въ Республіцѣ на цѣлый рокъ 10 Кч.,
за границю 17 Кч. — До Америки 0·50 (попъ) дол.
Одно число „Благовѣстника“ стоить 1 Кч.

РОЧНИКЪ VII.

ЧИСЛО 7.

ЮЛІЙ 1927.

Свѣтло Христово.

То свѣтло, что принесъ Христосъ изъ неба, еще и теперь свѣтить. Его основаніе, Церковь хр. каѳолическа высоко держить свѣтилникъ вѣры и освѣщає 300 милліоновъ каѳоликовъ и ширить свѣтло вѣры и межи поганами. Майже 2000 роковъ, что свѣтиться вѣра Хр. каѳолическа. На жаль не всѣ люблять свѣтло хр. Церкви и въ протягу довгихъ лѣтъ многъ одступили одъ сего свѣтла и теперь сидять въ темнотѣ. Заслѣплены они або ненавистю, або фанатизмомъ народности, або погружены въ матеріализмъ и замыкаютъ свої очи передъ свѣтломъ Христовимъ, передъ наукою Хр. каѳ. Церкви. Всѣ тѣ, котрѣ одступили одъ хр. каѳ. Церкви, хотѣли освободитися одъ приказовъ Божіихъ, хотѣли одтягнутися одъ сповненя обовязковъ хр. житія, хотѣли лекшій животъ провадити. Але ци найшли они сіе полекшеня въ другої вѣрѣ?

Въ нашей вѣрѣ передовсѣмъ е певность въ вѣрѣ. У насъ не е споровъ о вопросахъ вѣры, у насъ на каждый вопросъ вѣры е точна, певна одповѣдь, всѣ каѳолики на свѣтѣ ту саму одну вѣру исповѣдують и не вадяться межи собою, якъ и что треба вѣровати. А у протестантовъ, еретиковъ? Одъ коли Лутеръ вергъ межи нихъ св. Письмо, постоянно продовжаються споры о релігії. Роздѣлилися на больше сотъ сектъ, котрѣ межи собою вадяться — якъ оденъ протестантъ (Wigand) признае — „не надъ маловажными або другорядными вопросами вѣры,

але надъ основными точками вѣроисповѣданія". Многѣ изъ протестантовъ переходить до насъ, якразъ зато, что туй не е ніякихъ споровъ про религію, туй каждый знае, что має вѣровати, туй апостольскій престолъ е найвишими форумомъ въ дѣлахъ вѣры. А у гр. восточныхъ? Доки они жили подъ властію царя, тираннізмъ задуливъ всякѣ споры; але начимъ звергли царя, та колись славна „православна“ Церковь розпала на 3—4 части, котрѣ и въ вѣрѣ и въ управѣ постоянно несоглашаються. А у насъ на Подк. Р.? Туй хотя мало ихъ е, але зато не мають спокою; до вѣры, — правда — не много розумѣютъ, але вадятхся межи собою надъ епископами. Оденъ тягне до сербскоѣ, другій до чеської юрисдикції. Богобойный вѣрникъ не може успокоитися видячи той великий неладъ, что панує межи ними.

Яка утѣшаюча у насъ наука Христа о св. Тайнѣ покаянія. Чоловѣкъ-каѳоликъ знае, что не мусить носити зъ собою тягарь совѣсти. Въ св. сповѣди якъ легко можъ зложити тягарь и заслонити грѣшну будучность и починати цѣлкомъ новое житя. А той протестантъ, субботникъ, баптиста, у котрого Лутеръ викинувъ св. сповѣдь, ба где найде спокойї своеї душѣ и почue сѣ утѣшаючѣ слова: „Иди въ миръ...“ Они самѣ пишуть (Reichsbote 1899). „Что наша церковь якъ хлѣбъ каждодневный потребуе, то е сповѣдь. Тысячѣ суть, котрихъ переслѣдує тѣнь чорна минулости. Они любили бы вытерти чорное пятно изъ книги своеї жизни, але хибити слово прощеня, и то Божое слово изъ людскихъ усть“. И то майже такъ е и у гр. восточныхъ. У нихъ е сповѣдь, але то не важна, хиба на смертельной постели, если батюшка есть важно посвященый. Але у насъ много такихъ батюховъ крутяться, котрѣ не суть важно и законно посвященъ. Нашъ схизматикъ отже на самой смертельной постели не може певный быти, что одержавъ отпущеніе грѣховъ своихъ.

Такожъ лише у каѳ. Церкви находитися въ повнотѣ и св. Евхавистія. У нашихъ церквахъ постоянно окружають вѣрники найсв. Евхаристію. Протестантскій храмъ Божій, то е лише будинокъ молитвы, спѣву и проповѣди. Тамъ не е на престолѣ присутній Христосъ. Коли конецъ молитвы, запрутъ церковь и на цѣлый тыждень не

отворяться. А у насъ, коли одкончиться якасъ одправа, люде зостануть въ церкви и дальше моляться до Евх. Іисуса. И середъ дня хоть коли може вѣрникъ мати приступъ до церкви и въ довѣрочной молитвѣ поговорити зъ Спасителемъ. У гр. восточныхъ хотя и е Евхаристія, але тамъ якъ рѣдко приступаютъ, а церкви ихъ лише тогда отворенѣ, коли у нихъ одправа кончиться; а вѣрники ихъ не сить достаточно обученѣ, что то е найсв. Евхаристія и якъ еѣ почитати.

И на конци у обохъ вѣроисповѣдань: у протестантовъ и у схизматиковъ не е вѣра въ чистилище. Мы гр. каѳолики можеме свою помагающую руку протягнути и поза гроба и помагати нашими молитвами св. Службами и добрыми учинками нашимъ помершимъ. А той протестантъ або схизматикъ стоячи передъ гробомъ своеї матери може хоть сколько разъ поцѣловати руки еї, проливати хоть сколько слезъ — но его вѣрѣ — не поможете ничъ своей матери. Бо померша есть або въ царствѣ, где не потребує ніякоѣ молитвѣ, або въ пеклѣ, где зновъ даремна всяка молитва.

И такъ то свѣтло, что Христосъ запаливъ передъ XIX. столѣттями не свѣтить инде, якъ въ нашей хр. каѳолической Церкви. Будьме мы гордѣ на то, что мы належиме до сеї Церкви, до 300 мил. членової каѳ. Церкви и зробѣмъ крѣпку постанову: николи не одступиме одъ неї. Бо въ ней найдеме крѣпку вѣру, утѣху для нашої душѣ и спасеніе вѣчное. А за тыхъ, котрѣ сидять въ темнотѣ молѣмся, чтобы и имъ возсѣяло сонце и свѣтло правды и най буде одно стадо и одень пастырь.

Де знайти правду?

Написавъ свящ.: ТЕОДОЗІЙ ЛЕЖОГУБСКІЙ.
(Продовження).

Унія и схизма на Подк. Руси.

— А вы подкарпатскѣ русины, вы якъ стали греко-каѳоликами? звѣдає хворый.

— То е уже давна исторія. Знаете, что рока 1439 бывъ вселенскій соборъ въ Флоренцѣ; на семъ соборѣ присутнѣ были першіи епископы Востока, якъ Іосифъ Константиноп. патріархъ, Вессаріонъ

никейскій епископъ, потомъ Исидоръ кіевскій метропол. и самъ греческій императоръ. И на семъ соборѣ восточнѣ ступили зъ западными христіянами на соединеніе и признали первенство св. Петра и его наследниковъ римскихъ отцовъ. Была велика радость на цѣломъ свѣтѣ, что Востокъ и Западъ соединились и не е росколу межи христіянами.

По законченю собора Папа Евгений IV. возвавъ всѣхъ епископовъ, чтобы тыхъ восточныхъ христіянъ, котрѣ живутъ въ ихъ епархіяхъ не считали дальше схизматиками, але греко-каѳоликами. Богоѣдинѣ король же для тыхъ гр. каѳоликовъ, котрѣ въ большомъ числѣ жили в'едно заосновали окремъ епископства. Такъ Владиславъ II. угорскій король заразъ по Флорентійскомъ соборѣ заосновавъ для русиновъ греко-каѳоликовъ епископство въ Мукачевѣ и першимъ епископомъ назначивъ Маєія епископа. Передъ тимъ нашѣ русины были подъ Премышльскимъ епископомъ. И такъ видите, стародавное Мукачевское епископство первоначально не было схизматицкое, але греко-каѳолическое!

— Але я такъ знаю, что Подк. Р. лише г. 1646. стали уніятами!

— Послухайте лишь дале! По Флоренстійскомъ соборѣ король и епископы щиро занялися судьбою гр. каѳоликовъ. Але потомъ выбухла Лутерова ересь, повстали всякѣ войны, турки заняли Угорщину, спустошовали народъ и запановавъ совершенный переворотъ такъ, что король и римскій престолъ не могли достаточно творитися зъ дѣлами гр. каѳ. населенія. Не дивно отже, что дѣло св. соединенія подупало и помало зникло.

— Но, а потомъ кто имъ пригадавъ думку унії церковної? Звѣдае хворый.

— То было подъ впливомъ братовъ нашихъ Галицкихъ Русиновъ. Знаете, что Закарпатскѣ Русины уже р. 1596. стали гр. каѳоликами. Мукачевскѣ монахи мали дуже частѣ зносины з галицкими русинами-монахами и такъ сталося, что года 1640. монахи мукачевскѣ выбрали за игумена монастыря и Мукачевского епископа Василія Тарасовича. Сей походивъ изъ Галичини и видячи якъ красноразвиваєся духовное житя одъ коли заключили соединеніе, старався и онъ привернути давну унію и черезъ се подняти и морально и культурно Подкарп.-руській народъ.

— А намъ такъ казали, что унію зробили паны мадярскѣ и народъ насильно гнали на унію. Каже хворый.

— Противно! Якъ разъ панамъ не любилася унія. Бо знали, что зъ схизматицкими русинами могутъ хоть якъ обходитися, але если стануть гр.-каѳоликами, вступлять въ Хр. каѳол. Церковь, та уже не е такъ легко ихъ угнетати. Зато коли капитанъ Мукачевского замка дознався, что еп. Тарасовичъ хоче зложити гр. каѳ. вѣроисповѣданіе, давъ его ѣмити и одъ престола въ ризахъ епископскихъ одпровадити черезъ улицю города и заперти въ темницю мукачевскаго замка. Тамъ бѣдовавъ Тарасовичъ за цѣлѣ два роки и лише на ходатайство апостольского престола могъ высвободитися але, и тогда не могъ достатися въ монастырь. Такъ то панамъ не любилася унія, бо знали, что черезъ церк. соединеніе русинъ стане просвѣщеннымъ, стане членомъ Христової Церкви и не буде рабомъ пановъ.

Мукачовскѣ паны и Семигородскѣ князѣ и на дале все спинили и перешкаджали унії и все можливое здѣлали, чтобы она не розвинулася на хосенъ руського народа. И зато видиме, что они въ союзѣ съ калвинистами все поставляли противъ нашихъ епископовъ схизматицкихъ епископовъ и бунтовали народъ противъ унії.

Але ихъ махинація не удалася, бо священники и народъ якъ дозналися, что то церк. соединеніе, радо пристали на унію, такъ что коли Вас. Тарасовичъ года 1648. умеръ изъ 400 священниковъ зостало въ схизмѣ лише 30. Съ священики года 1646. въ Ужгородѣ зложили вѣроисповѣданіе, а потомъ года 1652. письменно заявили се римск. Апост. Престолу. У пару роковъ потомъ схизма цѣлковито щезла на Подкарпатю и всѣ русины стали гр. каѳоликами. Было се безъ жадного примусу, навѣть мимо волѣпановъ.

Одъ сего часу почали основати школы, русины мали образованыхъ священниковъ, повстали будителѣ народу, письменники словомъ по заведеню св. унії почавъ нашъ народъ подниматися культурно. Еще лѣпше укрѣпилася унія, коли цариця Марія Тerezія мукачевскому епископству дарovalа Ужгородскій замокъ и еп. резиденцію. Нашъ народъ лише благодарный може быти что ставъ греко-каѳоликомъ, бо черезъ се ставъ культичнымъ.

— А чому то теперь народъ руській такъ переступае на „православіе“. Звѣдае хворый.

— То є дѣло политики. Прійшли зайды, пройдисвѣты изъ Галичини и не маючи хлѣба, почали бунтовати народъ; а легковѣрный народъ дався звести, давъ имъ батюшковскій хлѣбъ и зробивъ ихъ панами. Батюхи стали панами, а народъ держить ихъ.

Потомъ и туй у насъ найшлися такъ, котрымъ не любилося копати-косити и злакомилися на панскій хлѣбъ. Кошишѣ, пастырѣ, кондашѣ, мурники, роботники, бохтеры, пяницѣ, выверженѣ дяки взяли на себе реверенду, до руки кадильницю, запустили бороду и готовый бывъ православный атьоцъ; до того научилися дасколько москальскихъ словъ якъ: „ето и какъ“ и почали нападати простацкимъ способомъ на нашихъ священниковъ и ширити схизму.

Зновъ суть въ Чехахъ такъ политичнѣ партії, якъ суть противъ вѣры христіянскої. Сесь подпорують схизму бо они хотѣли бы ослабляти христіянство. (Такъ на пр. комунисты и партія Гагатка). А дурнѣ русины сего не видягъ и нарочно лѣзутъ въ душевну пропасть.

Правда и то, что подъ мадярскимъ панованьемъ не можно было и нашимъ священникамъ такъ щиро заняться зъ народомъ. Бо если священникъ дачто доброго хотѣвъ зробити народови, мадяры заразъ подозрѣвали, что робить якусь руську або украинску политику. Такъ что народъ чувъ, чо залишений на свої силы; и зато видиме, что въ гдекотрихъ селахъ по револуції звертався противъ своего священника. Але теперь уже жалуютъ, бо видягъ, что батюхи и только не творяться зъ народомъ; але и не могутъ бо суть цѣлкомъ некультурнѣ и лише бунтовати знаютъ.

— Такъ тогды и я, хотя я родився православнымъ, не одобряю, что русины переходять на схизму.

— Якъ разъ такъ судять и вашъ лѣпшѣ соплемѣнники приходячѣ изъ Россіѣ и Україны. Они видяль, что тутешное кривославіе то не вѣра, але религійный комунизмъ. Коли видѣли, что схизматики якъ дикости роблять и робили супротивъ гр.-каѳоликовъ, — кам'янами обкидали ихъ, окна имъ выбивали, на улицы нападали на нихъ, худобѣ языкъ вырѣзали, подпалили гр.-каѳоликовъ, въ колодязь нафту ляли, и то не разъ, але повторительно — тогды они махнули на сяку вѣру и або перейшли до нась, або выступили изъ священства и стали свѣтскими людьми. А у схизматиковъ зостали лише кочѣши, гусопасы, вояки и бохтеры.

Хворый чуючи се довго роздумовав. Видно ганьбився, что Подк. схизматики таку ганьбу нанесли на православіе. О. Петро попращався зъ нимъ сердечно и одойшовъ. А хворый лежавъ майже непорушно, якъ той чоловѣкъ, кто сильно роздумує надъ дуже важною справою.

(Продовженя слѣдуе.)

Большевицькое выхованя.

Ниже подаме пару указокъ, изъ власныхъ предписовъ комунистовъ, односно выхованя молодежи. Такъ „Абецеда комунизмъ“ на стр. 89. (Бухаринъ и Преображенскій) каже: „Комунизмъ противиться религії—теоретично и практично“. „Богъ е лишь дѣтинскимъ понятемъ, которое вытворило людство въ пеленкахъ, понятемъ, которое е засуджено на смерть“. „Практично не може вѣрючій остатися комунистомъ, ибо вѣра рѣшає о моральномъ поведеню, а межи комунистичныхъ тенденцій и религійнѣ приписы суть рѣшучо противнѣ“.

Луначарскій, комисаръ освѣты, опубліковавъ въ одномъ числѣ „Безбожника“, заложеного для борьбы противъ Бога, такій манифестъ:

„Покончили'сме зъ царями сеземными, удаймeseя теперъ противъ царей небесныхъ. Желаеме „Безбожникови“ изъ цѣлого сердця повный успѣхъ въ бою противъ гнусного страхопуда Бога, который причинивъ цѣлому людству только діяволскаго зла, въ теченю цѣлыхъ исторій“.

Сеся порожна и глупа ненависть противъ Бога практикуєся въ школахъ и внѣ школы. Обы черезъ учениковъ нишили и у родичовъ религійность, въ радянскихъ републикахъ устроюются театральнѣ выставы „противрелигійнѣ суботы“, „маскарады“ и пр.

Въ книзѣ проф. Сатолея „Что'мъ видѣвъ въ радянской Россії“ на стор. 123. стоить написано „Дѣти воззываються, чтобы голосовали противъ Бога. И суть такъ сцены:

„Кто вѣруе въ Бога, най здвигне руку“. Три, четыри, шѣсть рукъ ся здвигне—двѣ опять одпадаютъ.

„Кто е противъ Бога“—и воскликъ:

Гурра! Богъ е переможеный...

Отъ такъ выховуе комунизмъ. Несчастнѣ то дѣти, что упали въ руки большевицкихъ выховательовъ.

Житя св. малої Терезії

До Родичовъ.

Весь християнській свѣтъ величає та любить нынѣ „малу святу“ „малу Терезію“, котру св. Отець Пій XI зачисливъ межъ святихъ. Еѣ житя, она сама написала, має дивну приману, потягає та учить кожного, безъ разницѣ стану та вѣку.

Передовсѣмъ ізъ еї житя можуть винести много хосна родичѣ. Блаженна Терезка одъ дѣтятки Іисусъ згадує на многихъ мѣстахъ, что если бы не прикладъ родичовъ, та окружения, и ихъ перестороги, напоминанія та науки, Божа благодать не розвинулабыся въ такой повнѣ въ еї душѣ, противно, не поборюванѣ природи, лихѣ наклоны были бы заглушили дѣланя благодати.

Родичѣ св. Терезії жертвовали кожду свою дитину Г. Богу, та просили для будучої дитини не славы, ни красы, але любви та крѣпкої вѣры. Зъ якою набожностю сповняла мати обовязки свого званя, не боячися трудовъ материнства! А якъ по геройськи отець дає призволеня дитинѣ ити за порывомъ душѣ, свѣдомый, что выбирає найкрасшу частю.

Кромѣ великої та нѣжної любви, что оказовали своєй наймолодшої донечцѣ Терезії, не одпускали ей найменшихъ хибъ, не терпѣли зла, домагалися одъ 2-рочної дѣвчинки дробныхъ жертвъ, та поборюванія злыхъ наклонностей. Іхъ одношення до дѣтей було чистое та взнеслое, они не боялися, якъ другъ родичѣ, подавати дѣтямъ правды вѣры, усували все, что могло бы згоршити дѣтей; не глядали для дѣтей славы, а нынѣ весь свѣтъ величає та любить св. Терезію.

Ци у вашихъ дѣтяхъ не є сихъ самыхъ скарбовъ, что спочивали у сердцѣ малої героїнї св. Терезії.

Розвивайте та толкуйте гадки може мало неяснѣ, заохочуйте до наслѣдованя малої Терезії, не обовязково правѣ въ выборѣ еї стану, але въ любви жертволовиности та добротѣ сердця. Учѣть вашъ потѣхи молитися до сеї вибраної лелѣйки. Най ихъ невиннѣ сердця вимолять для вашихъ родинъ та отчини обыльний дождь рожь.

Тогда дождетеся ізъ вашихъ дѣточокъ потѣхи, та выплекаете новое поколѣння, якое оддаватися буде не модѣ, не тому, что легкое та марное, але тому, что взнеслое та благородное.

Въ колысцѣ.

Геть далеко одъ нась, у Франції въ мѣсточку Алансонъ (Alanson) въ погодный день дециембра свѣтило ясное сонечко надъ хатами людей.

Лучъ сонця, что заглядали звичайно до оконъ та будили сплячихъ, нынѣ падали на одень домокъ та освѣяли его дивнимъ блескомъ.

Птички заглядали здивованѣ до оконъ та весело щебетали. Дѣти чули сей спѣвъ, але не чули, что ровночасно спѣвали надъ

домкомъ ангескъ хоры. Тамъ, у семъ домку лежала въ колысцѣ дѣтина, что за 25 лѣтъ мала вернути до неба, чтобы статися ихъ улюбленою сестрою. Спѣвали ангелскѣ хоры, хоть никто ихъ не видѣвъ.

Каждый изъ нихъ складавъ желанія маленькой Тerezіѣ:

— Желаю Тобѣ, чтобы ты была послушною, говоривъ оденъ изъ ангеловъ.

— Желаю тебѣ, чтобы ты любила родичовъ, та сестры — дававъ другій.

— Желаю тебѣ, чтобы ты говорила правду — повторявъ іншій.

Гарный, звѣздистый ангель збираясь до дѣтины та скававъ повагою:

— А я хочу, чтобы ты была побожною, та николи не засмутила Іисуса.

Іншій похилився надъ колыскою, шептавъ:

— Люби всѣхъ людей, дѣлай имъ добро, метай имъ рожы подъ ноги.

Послѣдній станувъ при дѣтинѣ Ангель-Хранитель, ослонивъ крылами маленьку, та повторявъ зъ любовію:

— Я не одступлю тя до смерти, але люби мене, та памятай про мене, а я заведу тебе до неба. Приношу тобѣ поцѣлуй одъ твоєї Матери въ небѣ: Маріѣ та одъ Дѣтятки Іисусъ.

И усмѣхнулася дѣтина въ колысцѣ до своего ангела, до Марії та дитятки Іисусъ, а изъ личка еї появилася дивна ясность. (Продовж.)

ВЪ ОБОРОНЪ ВѢРЫ.

1. **Іванъ Гусъ.** Бывъ родомъ чехъ и живъ одъ року 1369. до 1415. Бывъ римо-кат. священикомъ въ Празѣ; года 1415. бывъ проересь выключений изъ Церкви и Констанцѣ на розказъ короля Зигмунда на костеръ спаленый.

Его блуды перебранъ одъ англицкого Виклифа, головно въ трехъ точкахъ можеме совокупити:

1. Нѣ признавъ, что св. Петро бывъ головою апостоловъ установленый Іисусомъ Христомъ, и папы достали свою власть одъ первого христ. Императора Константина.

2. Твердивъ, что источникомъ вѣры е одиноко св. Писаніе а не такожъ и св. Преданіе.

3. Учивъ, что если папа або король упаде въ смертельный грѣхъ, утратять свою власть и подданники не повиннѣ имъ повиноватися.

На еретиковъ въ середномъ вѣку была положена смертна кара. Самъ найбóльшій историкъ Чеховъ: Палацкій признае, что въ „процессѣ Гуса всѣ юридичнѣ формы были поддержаны, а въ томъ не была ніяка кривда учинена“.

Спаленя еретиковъ было установлено не церковнымъ але свѣтскимъ закономъ еще року 1231. чѣсаремъ Фридрихомъ II. Церковное право не знало ни въ минувшинѣ, ни теперь ніякихъ смертельныхъ каръ. Церковь лише на то позванна, чтобы осудила, кто вѣруе правильно, а кто еретично (блудно). Церковь всегда мала право выключити еретиковъ изъ своего лону якъ то ей Христось передавъ словами: „Кто Церковь не послухае, най буде тобъ, якъ язычникъ и мытарь“. (Маѳ. 18. 17), т. е. най буде изъ Церкви выключений. Спаленя Гуса лише одъ XIX.-го столѣтія почали выкорыстati на агитацію противъ Церкви. Передъ тымъ приписали се лише на рахунокъ короля Зигмунда.

Если несправедливо дѣло было спалити одного чоловѣка за ересь, най возьмуть на увагу то, что гуситы не лише спалили, але страшнымъ способомъ змучили на смерть больше якъ 600 тысячъ католиковъ, межи которыми находилися много такихъ священниковъ, котрѣ о много выше стояли одъ Гуса. А гусита Жижка множество людей, котрѣ не такъ вѣрили якъ онъ (адамиты) спаливъ якъ еретиковъ. Въ середномъ вѣку спаленьемъ карали не лише еретиковъ, але и меншихъ злочинцовъ, на пр. фальшуючихъ грошей.

Самъ Гусъ вѣровавъ въ Бога и невѣріе считавъ найбольшимъ грѣхомъ. „Першій блудъ и грѣхъ е безбожіе. А сей грѣх е надъ всѣми другими грѣхами и корѣнь всѣхъ грѣховъ. Безбожникъ е ученикомъ діявола“ казавъ Гусъ. А нынѣшнѣ гуситы суть майже всѣ безъ релігії т. е. „bez vyznaní“. Гусъ такожъ почитавъ и Пр. Дѣву Марію. Высоко цѣнивъ и духовенство. Самъ казавъ: „Знаю много духовниковъ, котримъ не емъ достойный иззути обуви“. А нынѣшнѣ гуситы якъ честують священниковъ?

Чехи-католики почитаютъ Гуса, якъ народного будителя и писателя, але не перецѣнюють его заслуги. Бо было въ ческой исторіи еще много іншихъ и то больше заслуженныхъ мужовъ. А нынѣшнимъ гуситамъ радять, чтобы хоть лишь только вѣровали и такъ морально жили якъ ихъ учитель Иванъ Гусъ.

2. Большевизмъ—комунізмъ. Ихъ гасломъ е: „Розбийте храмы, вистрѣть класову борьбу, роздѣлѣть землѣ, смерть богачамъ“. Се е анархія. Большевизмъ хоче рай безъ Бога и заложуе его погрозою, грабежою забываючи, что основа раю е безгрѣшность и святость обывательовъ. Такими способами до раю не дойде, хиба до пекла.

Однокимъ оружіемъ большевизма-комунізма е тероръ т. е. насильствіе. Має войско, генераловъ, полковниковъ, поліцайний апаратъ „чреззвычайку“ и постоянно готовиться на кроваву войну.

Большевизмъ е смертельнымъ ворогомъ христіянства. На палатѣ Кремлу е написано: „Вѣра е обманомъ для народа“. Большевики — комунисты — послѣ ихъ властного признанія въ первыхъ трохъ мѣсяцяхъ убили 43.000 людей и задушили 114 повстань. До року 1923. убили 1.800.000 людей. Жидъ Бронштейнъ въ Петроградѣ убивъ тысяча дѣтей и невинныхъ жонъ а такожъ жидъ Кунъ Бейла въ Мадярщинѣ до колѣна бродивъ въ крови христіянъ. Най жie сволода, братерство и ровность и най жie рай комунистовъ!!

Выслѣды господарскѣ комунистовъ такожъ страшнѣ. Промыслъ зникъ, великѣ господарства знищилися а изъ грошей сконфискованныхъ великихъ маєтковъ наповнили свої кешенї паны комисары. Спаленї села, знищенї фабрики, осиротѣли дѣти, потоки крови и слезъ, голодомъ спустошенї цѣлѣ губернії (Екатеринославъ) суть доказами того раю, что сотворили комунисты въ Россіи... Если тутешнѣ агитаторы такъ хвалять комунистичный рай, чому не идуть до Россіи. Пасъ достали бы заразъ... Але нашему христіянскому народови най дають спокой!

Мѣсячное намѣреніе на Юлій.

...чтобы свѣтло Христовоѣ науки розширилося межи поганами.

Христосъ прійшовъ, чтобы всѣ народы, всѣхъ людей спасти; онъ пославъ апостоловъ своихъ „Научити всімъ языки“, онъ хотѣвъ, чтобы не лишь жиды, але всѣ люде и всѣ другѣ народы стали членами его св. Церкви.

Христовъ приказъ сповняє и его св. науки межи людьми проповѣдує и розширяє христ. каѳ. Церковь. Она навернула въ первихъ столѣтіяхъ народѣ римскоѣ имперіѣ, около 10.000 людей. Одъ 5-го до 15-го столѣтія зверталася до поганскихъ народовъ Европы и позыскала для Христа околи 100 милліоновъ людей. 16-го столѣтія навертала народы Америки и покрестила о. 200 милліоновъ людей. Нынѣшними днями Христова Церковь розширяє вѣру Христову головно межи китайцями, японцями, неграми и другими поганскими народами.

Всѣхъ людей, котрѣ належать до Христ. каѳ. Церкви е 315 милліоновъ. А поганъ, котрѣ еще ничего не знаютъ про Христа и про его св. науку е 867 милліоновъ. Се е огромное число! Се великое множество людей сидить въ темнотѣ, покланяются рукотвореннымъ болванамъ и провадять всякѣ неморальнѣ дѣла. Не можеме собѣ представити яку величезну працю выконають тѣ священники (миссіонарѣ), котрѣ межи поганами проповѣдують вѣру христіянску. не разъ падуть они жертвою всякихъ заразливыхъ хворотъ, або умрутъ мученицкою смертю, умордованї страшнымъ способомъ одъ дикихъ людей.

Кто може най подпирає грошми благодатну працю сихъ миссіонаровъ, чтобы могли тамъ, межи поганами устроити церковь, школу, монастырь, больницю, приютъ для наверненыхъ поганъ. Много разъ правѣ недостатокъ грошей е причиною, что миссіонары не годнѣ поступати навпередъ въ наверненю поганскихъ народовъ. А кто не може, най молиться за сию св. цѣль, чтобы Господь Богъ подавъ и навертаў сердця тыхъ 867 милліоновъ поганъ до Христа и до Его св. каѳол. Церкви.

Молитва на мѣсяць Юлій:

„О Іисусе, черезъ непорочное Сердце Пр. Д. Марії жертвуую тобѣ всѣ мої нынѣшнї думки, труды и терпѣнія на то намѣреніе, на что Ты себе жертвуешь въ св. Службѣ на цѣломъ свѣтѣ. Особливо же молюся, чтобы свѣтло Христовоѣ науки розширилося межи поганами“. Аминь.

ДОПИСИ

Одгуки схизмы.

Кажуть схизматики, что оброняють правдиву Христову вѣру. На дѣлѣ же методы ихъ боротьбы зводяться до комунистичної анархії. Гасло ихъ боротьбы, прикрыто православіемъ, е: пали, бий, кради все то, что стоить на перешкодѣ ихъ працѣ. Фактами сего най послужать слѣдуючѣ случаѣ, якѣ мали мѣсто въ Шир. Лузѣ.

1. Дня 4. XI. 1926 окружнымъ урядомъ въ Тересвѣ была передана церковь и церковный маєтокъ гр. каѳ. вѣрникамъ, та тоѣ самоѣ ночи одному изъ тутешныхъ гр. каѳ. запалили сѣно.

2. Коли одноѣ недѣлѣ гр. каѳ. вѣрники одважилися пойти до церкви, то схизмат. церк. громада зобралася напротивъ церкви рѣшати религійнѣ вопросы, результатомъ чого было, что до церкви посыпалося кам'яня, была проба заперти ихъ въ церкви, такъ что гр. каѳ. вѣрники примушеннѣ были церковь покинути и проводженѣ шумомъ и сыйствомъ пошли дому.

3. Черезъ два тижднї пошли гр. каѳ. вѣрники зновъ до церкви, але случилася та сама исторія. Мусѣли въ „асистенції“ легиньовъ, якѣ немилосердно знущалися надъ ними ити дому. На сей разъ женщинъ уже зъ ними не было. Послѣ тихъ двохъ случаевъ ити до церкви не осмѣляються.

4. Въ остатныхъ тиждняхъ изъ фары покрали окна.

Высшенаведенѣ случаѣ и всѣ подобнѣ случаѣ, якѣ мали мѣсто на салахъ Подк. Руси, де велася религійна боротьба, походили зъ ініціативы схизматиковъ, котрѣ не маючи змоги боронити свою идею культурными способами, и грають на найслабшихъ инстинктахъ народної масы и идуть рука объ руку зъ своimi товаришами комунистами.

А то, что „православнѣ“ зъ комунистами роблять одну и ту же роботу, свѣдчить, что члены „православнѣ“ церкви и комунистичної партії на селѣ однѣ и тѣ самѣ. Значить піонеры православія дойшли до одної цѣли зъ комунистами: деморалізаціѣ и деорганізації народныхъ масъ. Схизматики своimi неуками батюшками, а комунисты плачеными агентами зойшлися на одной дорозѣ. Робота православныхъ якъ такожъ комунистовъ послужила до розбытия руського народа, посъяла религійну и политичну сваду, выховала цѣлый кадръ голословныхъ демаговъ и агитаторовъ то православія то ко-

мунизму, котрѣ въ кождомъ выпадку мѣшають культурному и економичному поднесеню нашего народа. Одкрылася въ селѣ читальня, або народна торговля, то агитаторы несутъ туда религійнѣ и политичнѣ споры, результатомъ чого являється розбитя тое, ци ишо ѿрганізації.

Се вражѣня я вынесъ послѣ многихъ сутычокъ зъ подобными культурными працовниками типа агитатора Гагатка, або комунистичної школы. Одрожнити ихъ дуже тяжко. Здається, что кожда политична партія одного народа въ своїй конечности стремиться до обєднання его на культурномъ и економичномъ полю. Разница тое ци ишо партії въ поглядахъ не може служити причиною до розбитя одноцѣльного національного фронту. Однакъ у насъ стоить справа зовсѣмъ инакше. Судьба надарила насъ политиками хоть, правда, непрошеными, котрѣ своею ганебною працею доконали того, что народъ розбили на два таборы, что мѣшає и до нынѣ консолидації нашихъ силъ на культурномъ и економичномъ полю нашого краю.

Ізъ того виходить, что политичну працю можна уважати лише тихъ людей, котрѣ интересы нації ставлять выше своихъ властныхъ интересовъ, котрѣ будують, а не руйнують, а житя еще разъ переконає нашого пришлого политика, что противъ рожна ити неможна, что ренегатска политика можлива до того часу, докѣ народнѣ масы не прозрѣють и не попадуть на правдивѣ пути до культурного и економичного вызволеня.

Нынѣ наэрѣвъ часъ опамятатися и лишити ту руйнуючу працю, бо кто є одповѣдный за то, что схизматикъ гр. каѳ.-ови спалить хижу, сѣно, выбивае окна, украде, что жандармы боронячи публичного спокою примушенѣ часомъ уживати зброю и проливати руську кровь при спорахъ изза церковныхъ будинковъ, за секвестръ селянскаго маєтку за знищенї и безправное хоснованя церковныхъ земель, за цѣлу армію голодныхъ батюшковъ, котрѣ тѣгаються по цѣлый Подк. Руси за кускомъ дарованого хлѣба (большостъ изъ которыхъ одорвана одъ сѣльского труда). Бо нынѣ е очевиднымъ кождому, что виновникъ сего лиха есть тогъ, котрый ту акцію розпочавъ и до нынѣ веде, и всѣ тогъ, котрѣ тогу акцію подпорують.

Публикованя всѣхъ подобныхъ выпадковъ находжу потребнымъ для ознакомленя народныхъ мас, чтобы въ будучомъ остерѣгалися тихъ политиковъ, котрѣ своею демагогією ведуть народъ въ блудъ, якъ то зробили нашѣ православнѣ трудовики за короткий часъ свого политизованя.

Русинъ.

Высокопочтенна Редак. газеты „Благовѣстника“

въ Ужгородѣ.

Даю на знаня почт. редакціи и вручаю въ вниманіе Ц. К. О. В. что схизматики еще отъ выбуха схизмы незаконно уживають четыри хорухвы а два кресты до походу, кадилницю и звоны.

Всѣ сесѣ предметы суть собственостю нашої гр. каѳ. церкви. Заставы и кресты переробили на свой ладъ, то есть на хорухвы

изробили трираменнѣ кресты, тоже и походнѣ кресты такъ переробили будто бы лучше было. Прошу славну редакцію дати намъ на сесе дѣло пораду.

Ибо нашѣ вѣрники тымъ суть дуже огорченѣ. Намъ дорога наша отцевска греко. каѳ. православна вѣра. Мы высоко цѣниме нашъ прекрасный восточный обрядъ, нашѣ церковнѣ приборы и то не допушаеме чтобы отступники незаконно присвоили собѣ чужій маетокъ еще ко тому издѣвалися надъ нашими крестами.

Не знаю якъ не стыдно твердымъ православнымъ такого дѣла. Потомъ на хорухвахъ есть изображеніе св. свмч. Іосафата, который есть по ихъ мнѣнію палачемъ православія. Якъ то и батюхъ Пастуховъ выразився на похоронѣ у моего брата: Уніятскій Іосафать. Что не лучше бысте отступники изробили, если бысте дали собѣ изробити заставы зъ изображеніемъ Фотія и Керуларія то бы вамъ было по вашому и тогда не унижали бысте нашего святого угодника, котрого наша св. церковъ такъ wysoko почитае.

Прошу помѣстити въ Благовѣстнику новѣйшій образецъ изъ насилиствія схизматиковъ въ Гукливомъ.

Дня 30-го апрѣля отбылася головна росправа въ Судовой Столицѣ въ Ужгородѣ въ дѣлѣ вымѣтovanія звѣрскимъ тероромъ схизматиковъ мене изъ квартиры гр. каѳ. школы. Обжалованыхъ было 16 лицъ женского пола а одинъ чоливѣкъ. Обжалованыхъ заступавъ Др. Гагатко, который старався зовсѣмъ неправдивѣ замѣтки давати въ оборону своихъ кліентовъ. Между прочимъ казавъ что мене не только схизматики вымѣтovали но и гр. каѳолики. Межи прочими споминавъ такѣ лица, что я могъ документально доказати, что уже были одступниками въ тотъ часъ.

Но сего не было потребно, ибо такъ были записаны въ судебныхъ актахъ. Судъ узнавъ ихъ винными и осудивъ единокажду на одинъ мѣсяцъ аресту.

Того самого дня коли я вернувся зъ своею женою изъ Ужгороду, найшовъ, емъ на квартерѣ всѣ окна выбито.

Другій примѣръ дня 22-го мая. Одкончили мы утреню и нашѣ вѣрники поросходилися до дому, тогда надойшли схизматики селомъ зъ процесію, царину святити. Идучи по при нашу церковь послали одного изъ между себе Дзамка Федора; тотъ вылѣзъ на звоницу нашої церкви и зачавъ на смѣхъ у звоны гремѣти якъ на тревогу въ случаю пожару и гремѣвъ на смѣхъ черезъ повдругой годины.

Сей чоловѣкъ уже бывъ одсудженъ за вымѣтованіе мене изъ квартеры на мѣсяцъ аресту но не прошло одинъ мѣсяцъ а сесь предтеча котрого схизматики усяди навперед посылаютъ, совершивъ подобный тероръ первому то есть нарушивъ чужій маетокъ.

Что скаже на то комитетъ которому и такъ колисъ треба буде дати отвѣтъ за несправное отнесеніе двохъ паръ церковныхъ

заставъ, котръ взятъ изъ нижной и Веретечовской звоницѣ и за звоны также.

Прошу Цент. К. О. В. вручити съ беззаконія дотычнымъ властомъ. Прошу написати до Благовѣстника, чтобы сякъ беззаконія не пропали безъ слѣда, но чтобы подобнѣ подвиги были записанѣ въ исторіи будущого поколѣнія въ славу фотіянскоѣ зреси.

Гукливе, 22. V. 1927.

Эъ поченіемъ
Михаилъ Козикъ
гр. каѳ. цер. пѣвецъ

Высокопочтенна редакція „Благовѣстника“

въ Ужгородѣ.

Прошу сообщити на столбцяхъ нашоѣ вѣроборонительноѣ газетѣ слѣдующое:

Любезнѣ читателѣ Благовѣстника и Прав. христіяне!

Тяжкѣ часы переживае наша св. Мати Церковь каѳ. Ворогъ христіянской правды не спить, но продовжае swoimi беззаконными дѣйствіями тероризовати руській народъ то насильствіемъ, або обманомъ, брехнею и безбожною противърною пресою.

Безбожною пресою найльпше воюе діяволь противъ Христовой Церкви, ибо уживае всякого рода клеветы и фальшивѣ историчнѣ доказы и невѣдомый народъ иде за ними якъ рыба за маслагомъ.

Подобный маслагъ найдеме въ газетѣ „Р. З.“ ч. 20. 19. V. 1927. подъ заглавіемъ „Посмертное сообщеніе“. Туй описуе названа газета смерть и похоронъ гр. каѳ. священника о. Вл. Ройковича въ Межилаборцяхъ. Где котръ бы думали, что сеся газета якъ политичній органъ не мѣшае вѣру въ политику, але бореся за права и лѣпшу будучность Руського народа. Але дѣло не такъ стоить. Сеся газета лишь раздоръ принесла межи народъ, а больше ничего, доказуе еѣ майже каждое число. Возьмѣмъ пр. ч. 20. 19. V. 1927. въ одномъ мѣстѣ будто сочувствує смерть гр. каѳ. священника о. В. Ройковича, а въ другомъ мѣстѣ повно ненависти къ той Церкви и вѣрѣ, яку исповѣдовавъ покойный священникъ. На прим. въ статьї Пастухова „Православные Христіяне!“ пише авторъ, что повтора года тому назадъ, одно изъ большихъ сель Верховины Гукливе оставило Римскій блудъ и мачоху унію. Дале пише авторъ: православнѣ Гукливцѣ не забыли посмертныхъ словъ св. Меѳодія „Славяне бойтесь Рима!“ Ха, ха, ха, ци сесе не пуста ложъ? Нигда не было слышано, чтобы по смерти дакто говоривъ и завѣщавъ, такъ и исторія не доказуе, что Меѳодій по смерти говоривъ. Ци сесе не брехня а не маслагъ? Лишь глядайте Православны Гукливцѣ, где е написано, что св. Меѳодій по смерти говоривъ, та скорше найдете, что св. братовъ Кирилла и Меѳодія Римскій отецъ потвердивъ на епископовъ и одобривъ ихъ науку, а не Фотій, хиба Фотійова исторія то бреше, что Меѳодій по смерти говоривъ.

Дале пише „Р. З.“ „И паки Радуйтесь!“. Описуе туй переходъ прав. священниковъ на унію Крейера и Ружицко-го. Панове изъ „Р. З.“ А почему вы терпѣли беззаконія вашего бывшого священника Крейера до теперь? Лишь теперь выявляете его грѣхи, якъ лишивъ вашу ересь. Такъ вы знаете и така ваша привычка ругати и клеветати на того, кто не иде за вашу команду.

Потому пише на первой сторонѣ „Р. З.“, что гдеjakъ говорять Карп. Руській народъ дуже осталый и убогій, тому виноватъ Римъ и Римска унія. Панове, изъ „Р. З.“ то никто по моему мнѣнію не говорить лишь вы, котрѣ то пишете и тотъ, котрѣ вами суть соблазненѣ.

Схизматикамъ, котрѣ таку тверду вѣру мають, можно нарушовати чужій маєтокъ, можно ругати и урывати честь другому, можно шкоду робити другому, беспокоити и мѣшати дурнымъ (по ихъ разуму) уніятамъ въ Богослуженію, то у нихъ не есть грѣхомъ, ибо они такимъ способомъ ширягть православну вѣру.

Римъ и римска унія, николи не допускае такъ беззаконія, якъ роблять одступники. На прим. у насъ у Гукливомъ дѣвка Ст. Бирака нарочно лишь на улицѣ передъ нашою церквою пасе скоты, а коли кончиться у церкви Богослуженіе, то нарочно подъ церквою спѣвае безнравственнѣ пѣснѣ гр. каѳ.-амъ, а еѣ твердый православный отець навѣрно скаже, что она дурна. А я на то скажу, что на дурныхъ мѣсто есть въ больницѣ, а вмѣшатися въ Богослуженію, все такъ не красное дѣло. Онъ якъ родный отець, може за ню отвѣчати. Дале, коли настануть жнива, то у схизматиковъ така культура розводиться, что и такъ дѣвки, что подъ вѣнець идуть скоро, то спѣваютъ безнравственнѣ пѣснѣ гр. каѳ.-амъ, илучи у ночи изъ поля, а то все на славу ихъ твердоѣ вѣры.

Гукливо, 24. V. 1927.

Михаилъ Козикъ.

НОВОСТИ

Апостолство Молитви въ Сусковѣ. На недѣлю св. жонъ Мироносиць одбылося торжество открытія и заоснованія Тов-а Ап. Молитвы въ Сусковѣ (ж. Берег). Св. проповѣдь державъ и св. Службу одправивъ о. Феофанъ Скиба ЧСВВ., кто своимъ краснорѣчіемъ глубоко тронувъ сердця вѣрниковъ. Разомъ одбылося и первое св. Причащеніе дѣтей. По св. Службѣ бывъ торжественный обходъ зъ найсв. Евхаристію. Число причастни-

ковъ доросlyхъ было: 152 а дѣтей 35. Вѣрники подъ впливомъ сего торжественного случаю зверталися до ревного своего душпаstryя о. Конс. Пузы зъ просьбою, чтобы девятый четверть якъ праздникъ Пресв. Евхаристіѣ по сему каждого року явно и торжественно обходили. Число членовъ записавшихся въ Ап. Молитвы: 110.

Храмовѣ праздники въ Рускомъ и въ Вел. Лучкахъ. Въ сихъ двохъ селахъ сего року

першій разъ обходили нашъ гр. каоол. вѣрники „Храмъ Церкви“ одколи освободилися изъ подъ гнета схизматицкого. Въ Руськомъ на Сошествіе св. Духа на только наповнилася церковъ гр. као. вѣрниками, что богато людей не вмѣстилося въ церкви. Проповѣдь была и въ церкви и передъ церкю. Св. Службу Божу одправлявъ о. Евг. Хира въ супроводѣ священиковъ А. Ильницкого, Ст. Тивадира а Ем. Бокшая и діякона Г. Валайды. На св. Службѣ прекрасно спѣвавъ цер. хор. изъ Мал. Давидкова подъ проводомъ п. учителя Палюха. Схизматики коло церкви въ бараку кончили свої одправы. Въ В. Лучкахъ на Вознесеніе бывъ праздникъ „Храмъ Церкви“, такожъ въ присутствіи множества вѣрниковъ. Схизматики на улицѣ згromadiлися и тамъ кончили. „Русска Земля“, ся газеточка одступниковъ, чтобы притягнути чимъ больше число схизматиковъ розпустила вѣсть, что и до Вел. Лучокъ и до Руського на „Храмъ Церкви“ прїде Ириней. Добре она знала, что Ириній уже давно махнувъ на „православіе“ Подкарпатское, але раховала на то, что еще все найдуться люде, котрѣ повѣрять ей. Не бывъ Ириней нѣ въ Лучкахъ, нѣ въ Руськомъ. Але сей способъ агитаціѣ с доказомъ того, что якось тѣ „твердѣ православї“ не знаютъ, або не хотятъ простою дорогою ходити.

Число католиковъ въ Америцѣ. (Соед. Держ.) года 1925 было 19 миллинов, мають 4 кардиналовъ, 1 архіепископа, 101 епископовъ, 23.697 священиковъ и 120 духовныхъ семинарій. Кож-

дого року переходить на католицизмъ пересѣчно 60.000 людей.

Культура схизматиковъ. Въ селѣ Завидово, честный чоловѣкъ уже не смѣе выйти на улицю, ибо большевики на нього нападаютъ. Дня 22-го мая одному честному господарю по имени Кишо сесь розбишаки и большевики около пятнадцать разъ стрѣлили до хижѣ, а кроме того, скосили ему 2 угражита, за то, ибо—якъ Кишо говорить—не хоче переступить на православну вѣру. Вручаеме се пану окружному начальнику во увагу, чтобы давъ приказъ жандармамъ, чтобы лучше хоронили честныхъ жителей села одь такихъ брутальныхъ нападовъ разного рода розбишак. Въ селѣ Завидово староста большевикъ, и якій онъ, такій и порядокъ завѣвъ въ своею селѣ. Такъ страдаютъ потомъ земледѣльцѣ, если при сельскихъ выборахъ не постаралисся о порядну кандидатуру на старосту. Свобода.

Миссія въ Новоселици. Дозволеніемъ и благословеніемъ Преосв. Епископа Петра въ Новоселици одь 21. до 29. была подержана миссія. Проповѣдей было 24, что держали о. Стефанъ Решетило и о. Феофанъ Скиба Василіяне. ОО. завели двѣ прекраснѣ Богослуженія, малый Праклісъ и молебень до Найсв. Евхаристіѣ. Высповѣдалося 1020 вѣрниковъ. Народъ такъ полюбивъ монаховъ, что просивъ Преосвященого и на отпустъ св. Кирилла и Меѳодія загнати ихъ знова до Новоселицѣ. На посвященії міссійнаго Креста притомно было 1500 душъ, хотя дождь падавъ.